



Jumat, 09 Oktober 2020

Ogen: Masmur 16 : 8-9



Pusuhku ersurak surak



Keriahen ukur labo itentukan i bas kalak sideban nari tapi i bas dirinta jine, uga erbahansa kita tetap ermeriah ukur anem gia kai si terjadi i bas kegeluhenta. Kalak si ermeriah ukur biasa icidahkenna arah tawa, nuriken man kalak sideban sabap lit si erbahansa meriah ukurna, lit ka deba rende, lit ka deba isehkena pengataken bujurna man Dibata. Si enda kerina aksi silakoken erkiteken meriah ukur. Keriahen ukur e pe banci ka nge erkiteken seh sura-surana, erkiteken sehat-sehat ia igejapna erkiteken Dibata singlarak-ngarak kegeluhenna bagepe erkiteken mbelin kal pasu-pasu Tuhan i bas geluhna. Tentu kita pe lit ka nge alasenta ermeriah ukur, ersurak ras ngataken bujur man Tuhan. Renungenta ngajuk nggejabken belinna kuasa Tuhan nina:

- J) Tetap ku gejap maka Dibata ndeher ras aku, gelah aku tetap paguh. Igejabna paguh ia erkiteken Tuhan tetap ndeher ras ia, emaka kai pe si man alanken la ia mobah, la ia mbiar erkiteten Dibata ndeher ras njayam kegeluhenna.
- J) Erkiteken penjayamen Tuhan si erbahansa ia ermeriah ukur emaka nina ersurak-surak senang tendingu. Igejapkenna si mbagesna kal eme tendina pe ersurak erkiteken keriahen si dem i bas pusuh perukurena.

Tahun enda Moria GBKP enggo 63 tahun dekahna ikut muat bagin i bas pelayanen kerna Berita Si Meriah, si enda erbahansa maka tetap kita ngataken bujur man Tuhan. Patut maka tetap kita erbahan si mehuli erkiteken melala kal pasu-pasu Tuhan man banta, tetapliah pusuhtha ersurak-surak muji Tuhan erkiteken seh ngasa genduari enda kita lit i bas keadan sehat sabap e me si mbelinna pasu-pasu i bas dibata nari. Adi kita sehat kai pe banci silakoken, ras kai pe banci sinikmati erkiteken sie maka tetap kita ngataken bujur man Tuhan i bas kerina dampar kegeluhenta. Pandemi covid enda la erbahansa kita putus asa tapi reh gegehna i bas Tuhan.